

四庫全書

集部

欽定四庫全書

集部  
古文雅正卷十一

詳校官右中允<sub>臣</sub>薩敏

主事銜<sub>臣</sub>徐以坤覆勘

總校官庶吉士<sub>臣</sub>朱鈐

校對官編修<sub>臣</sub>王汝嘉

謄錄監生<sub>臣</sub>陳汝光

欽定四庫全書

古文雅正卷十一

禮部侍郎蔡世遠編

列女傳目錄序

曾鞏

劉向所叙列女傳凡八篇事具漢書向列傳而隋書及  
崇文總目皆稱向列女傳十五篇曹大家注以頌義考  
之蓋大家所注離其七篇為十四與頌義凡十五篇而  
益以陳嬰母及東漢以來凡十六事非向書本然也蓋

向舊書之亡久矣嘉祐中集賢校理蘇頌始以頌義為  
篇次復定其書為八篇與十五篇者並藏於館閣而隋  
書以頌義為劉歆作與向列傳不合今驗頌義之文盡  
向之自叙又藝文志有向列女傳頌圖明非歆作也自  
唐之亂古書之在者少矣而唐志錄列女傳凡十六家  
至大家注十五篇者亦無錄然其書今在則古書之或  
有錄而亡或無錄而在者亦衆矣非可惜哉今校讐其  
八篇及十五篇者已定可繕寫初漢承秦之敝風俗已

大壞矣而成帝後宮趙衛之屬尤自放向以謂王政必  
自內始故列古女善惡所以致興亡者以戒天子此向  
述作之大意也其言太任之娠文王也目不視惡色耳不  
聽淫聲口不出教言又以謂古之人胎教者皆如此夫  
能正其視聽言動者此大人之事而有道者之所畏也  
顧令天下之女子能之何其盛也以臣所聞蓋為之師  
傳保姆之助詩書圖史之戒珩璜琚瑀之節威儀動作  
之度其教之者雖有此具然古之君子未嘗不以身化

也故家人之義歸於反身二南之業本於文王夫豈自  
外至哉世皆知文王之所以興能得內助而不知所以  
然者蓋本於文王之躬化故內則后妃有關雎之行外  
則羣臣有二南之美與之相成其推而及遠則商辛之  
昏俗江漢之小國兔置之野人莫不好善而不自知此  
所謂身修故國家天下治者也後世自學問之士多徇  
於外物而不安其守其室家既不見可法故競於邪侈  
豈獨無相成之道哉士之苟於自恕顧利冒恥而不知

反已者往往以家自累故也故曰身不行道不行於妻  
子信哉如此人者非素處顯也然去二南之風亦已遠  
矣況于南鄉天下之主哉向之所述勸戒之意可謂篤  
矣然向號博極羣書而此傳稱詩芣苢柏舟大車之類  
與今序詩者之說尤乖異蓋不可考至於式微之一篇  
又以謂二人之作豈其所取者博故不能無失歟其言  
象計謀殺舜及舜所以自脫者一合於孟子然此傳或  
有之而孟子所不道者蓋亦不足道也凡後世諸儒之

言經傳者固多如此覽者采其有補而擇其是非可也故為之序論以發其端云

子固文本經術古茂處亦有西京風味茅鹿門謂其序諸書不徒詳其緣起往往有一段大議論此序其一也

先大夫集後序

曾鞏

公所為書號僊鳬羽翼者三十卷西陲要紀者十卷清邊前要五十卷廣中台志八十卷為臣要紀三卷四聲



韻五卷總一百七十八卷皆刊行於世今類次詩賦書  
奏一百二十二篇又自為十卷藏於家方五代之際儒  
學既擯焉後生小子治術業於閭巷文多淺近是時公  
雖少所學已皆知治亂得失興壞之理其為文閎深雋  
美而長於諷諭今類次樂府已下是也宋既平天下公  
始出仕當此之時太祖太宗已綱紀大法矣公於是勇  
言當世之得失其在朝廷疾當事者不忠故凡言天下  
之要必本天子憂憐百姓勞心萬事之意而推大臣從

官執事之人觀望懷奸不稱天子屬任之心故治久未  
治至其難言則人有所不敢言者雖屢不合而出而所  
言益切不以利害禍福動其意也始公尤見奇於太宗  
自光祿寺丞越州監酒稅召見以為直史館遂為兩浙  
轉運使未久而真宗即位益以材見知初試以知制誥  
及西兵起又以為自陝以西經略判官而公嘗切論大  
臣當時皆不悅故不果用然真宗終感其言故為泉州  
未盡一歲拜蘇州五日又為揚州將復召之也而公於

是時又上書語斥大臣尤切故卒以齟齬終公之言具大者以自唐之衰民窮久矣海內既集天子方修法度而用事者尚多煩碎治財利之臣又益急公獨以謂宜遵簡易罷筦榷以與民休息塞天下望祥符初四方爭言符應天子因之遂用事泰山祠汾陰而道家之說亦滋甚自京師至四方皆大治宮觀公益諍以謂天命不可專任宜絀姦臣修人事反覆至數百千言嗚呼公之盡忠天子之受盡言何必古人此非傳之所謂主聖臣

直者乎何其盛也何其盛也公在兩浙奏罷苛稅二百三十餘條在京西又與三司爭論免民租釋逋負之在民者蓋公之所試如此所試者大其庶幾矣公所嘗言甚衆其在上前及書亡者蓋不得而集其或從或否而後嘗可思者與歷官行事廬陵歐陽公已銘公之碑特詳焉此故不論論其不盡載者公卒以齟齬終其功行或不得在史氏記籍令記之當時好公者少史其果可信歟後有君子欲推而考之讀公之碑與書及予小子

之序具意者具見其表裏其於虛實之論可覈矣公卒  
乃贈諫議大夫姓曾氏諱某南豐人序其書者公之孫  
鞏也

通篇贊乃祖直節兼說出所以不得大用之故有起  
有收中分數段篇法井然

宜黃縣學記

曾鞏

古之人自家至於天子之國皆有學自幼至於長未嘗  
去於學之中學有詩書六藝弦歌洗爵俯仰之容升降

之節以習其心體耳目手足之舉措又有祭祀鄉社養老之禮以習其恭讓進材論獄出兵授捷之法以習其從事師友以解其惑勸懲以勉其進戒其不率其所以為具如此而其大要則務使人人學其性不獨防其邪僻放肆也雖有剛柔緩急之異皆可以進之於中而無過不及使其識之明氣之充於其心則用之於進退語默之際而無不得其宜臨之以禍福死生之故而無足動其意者為天下之士而所以養其身之備如此則又

使知天地事物之變古今治亂之理至於損益廢置先後終始之要無所不知其在堂戶之上而四海九州之業萬世之策皆得及出而履天下之任列百官之中則隨所施為無不可者何則其素所學問然也蓋凡人之起居飲食動作之小事至於修身為國家天下之大體皆自學出而無斯須去於教也其動於視聽四支者必使其洽於內其謹於初者必使其要於終馴之以自然而待之以積久噫何其至也故其俗之成則刑罰措其

材之成則三公百官得其士其為法之永則中材可以  
守其入人之深則雖更衰世而不亂為教之極至此鼓  
舞天下而人不知其從之豈用力也哉及三代衰聖人  
之制作盡壞千餘年之間學有存者亦非古法人之體  
性之舉動唯其所自肆而臨政治人之方固不素講士  
有聰明朴茂之質而無教養之漸則其材之不成夫然  
蓋以不學未成之材而為天下之吏又承衰弊之後而  
治不教之民嗚呼仁政之所以不行盜賊刑罰之所以



積其不以比也歟宋興幾百年矣慶厯三年天子圖當世之務而以學為先是天下之學乃得立而方比之時撫州之宜黃猶不能有學士之學者皆相率而寓於州以羣聚講習其明年天下之學復廢士亦皆散去而春秋釋奠之事以著於令則常以廟祀孔氏廟廢不復理皇祐元年會令李君詳至始議立學而縣之士某某與其徒皆自以謂得發憤於此莫不相勵而趨為之故其材不賦而羨匠不發而多其成也積屋之區若干而

門序正位講藝之堂栖士之舍皆足積器之數若干而祀飲寢食之用皆具其像孔氏而下從祭之士皆備其書經史百氏翰林子墨之文章無外求者其相基會作之本末總為日若干而已何其周且速也當四方學廢之初有司之議固以謂學者人情之所不樂及觀此學之作在其廢學數年之後唯其令之一倡而四境之內響應而圖之如恐不及則夫言人之情不樂於學者其果然也歟宜黃之學者固多良士而李君之為令盛行

愛立訟清事舉其政又良也夫及良令之時而順其慕  
學發憤之俗作為宮室教肄之所以至圖書器用之須  
莫不皆有以養其良材之士雖古之去今遠矣然聖人  
之典籍皆在其言可考其法可求使其相與學而明之  
禮樂節文之詳固有所不得為者若夫正心修身為國  
家天下之大務則在其進之而已使一人之行修移之  
於一家一家之行修移之於鄉鄰族黨則一縣之風俗  
成人材出矣教化之行道德之歸非遠人也可不勉歟

縣之士來請曰願有記故記之十二月某日也

比吉州慈溪學記更說得詳明親切有學識有筆力  
此種文於世道人心大有關係堪與原道並傳○曾  
文多本經術議論亦平實故朱子喜讀之

撫州顏魯公祠堂記

曾鞏

贈司徒魯郡顏公諱真卿事唐為太子太師與其從父  
兄杲卿皆有大節以死至今雖小夫婦人皆知公之為  
烈也初公以忤楊國忠斥為平原太守策安祿山必反

為之備祿山既舉兵與常山太守杲卿伐其後賊之不  
能直闖潼關以公與杲卿撓其勢也在肅宗時數正言  
宰相不悅斥去之又為御史唐旻所構連輒斥李輔國  
遷太上皇居西宮公首率百官請問起居又輒斥代宗  
時與元載爭論是非載欲有所壅蔽公極論之又輒斥  
楊炎盧杞既相德宗益惡公所為連斥之猶不滿意李  
希烈陷汝州杞即以公使希烈希烈初慙其言後卒縊  
公以死是時公年七十有七矣天寶之際久不見兵祿

山既反天下莫不震動公獨以區區平原遂折其鋒四方聞之爭奮而起唐卒以振者公為之倡也當公之開土門同日歸公者十七郡得兵二十餘萬繇此觀之苟順且誠天下從之矣自此至公歿垂三十年小人繼續任政天下日入於弊大盜繼起天子輒出避之唐之在朝臣多畏怯觀望能居其間一忤於世失所而不自悔者寡矣至於再三忤於世失所而不自悔者蓋未有也若至於起且仆以至於七八遂死而不自悔者則天下

一人而已若公是也公之學問文章往往離於神仙浮屠之說不皆合於理及其奮然自立能至於此者蓋天性然也故公之能處其死不足以觀公之大何則及至於勢窮義有不得不死雖中人可勉焉況公之自信也歟惟歷忤大奸顛跌撼頓至於七八而終始不以死生禍福為秋毫顧慮非篤於道者不能如此此足以觀公之大也夫君之治亂不同而士之去就亦異若伯夷之清伊尹之任孔子之時彼各有義夫既自比于古之任

者矣乃欲瞻顧回隱以市於世其可乎故孔子惡鄙夫不可以事君而多殺身以成仁者若公非孔子所謂仁者歟今天子至和三年尚書都官郎中知撫州聶君某尚書屯田員外郎通判撫州林君某相與慕公之烈以公之嘗為此邦也遂為堂而祠之既成二君過予之家而告之曰願有述夫公之赫赫不可蓋者固不繫於祠之有無蓋人之嚮往之不足者非祠則無以致其至也聞其烈足以感人況拜其祠而親炙之者歟今州縣之



政非法令所及者世不復議二君獨能追公之節尊而  
事之以風示當世為法令之所不及是可謂有志者也  
魯公歷事四朝丹心浩氣九死不移子固直以堂正  
之旗陣發之震耀聳動故曰至文

越州趙公救菑記

曾鞏

熙寧八年夏吳越大旱九月資政殿大學士右諫議大  
夫知越州趙公前民之未饑為書問屬縣菑所被者幾  
鄉民能自食者有幾當廩於官者幾人溝防構築可僦

民使治之者幾所庫錢倉粟可發者幾何富人可募出粟者幾家僧道士食之羨粟書於籍者其幾具存使各書以對而謹其備州縣吏錄民之孤老疾弱不能自食者二萬一千九百餘人以告故事歲廩窮人當給粟三千石而止公歛富人所輸及僧道士食之羨者得粟四萬八千餘石佐其費使自十月朔人受粟日一升幼小半之憂其衆相蹂也使受粟者男女異日而人受二日之食憂其且流亡也於城市郊野為給粟之所凡五十

有七使各以便受之而告以去其家者勿給計官為不足用也取吏之不任職而寓於境者給其食而任以事不能自食者有是具也能自食者為之告富人無得閉糶又為之出官粟得五萬二千餘石平其價予民為糶粟之所凡十有八使糶者自便如受粟又儆民完城四千一百丈為工三萬八千計其傭與錢又與粟再倍之民取息錢者告富人縱予之而待熟官為責其償棄男女者使人得收養之明年春大疫為病坊處疾病之無

歸者募僧二人屬以視醫藥飲食令無失所時凡死者  
使在處隨收瘞之法廩窮人盡三月當止是歲盡五月  
而止事有非便文者公一以自任不以累其屬有上請  
者或便宜多輒行公於此時蚤夜憊心力不少懈事鉅  
細必躬親給病者藥石多出私錢民不幸罹旱疫得免  
於轉死雖死得無失斂埋者公力也是時旱疫被吳越  
民饑饉疾病死者殆半蓄未有鉅於此也天子東向憂  
勞州縣推布上恩人人盡其力公所拊循民尤以為得

其依歸所以經營綏輯先後終始之際委曲纖悉無不  
備者其施雖在越其仁足以示天下其事雖行於一時  
其法足以傳後蓋蓄沴之行治世不能使之無而能為  
之備民病而後圖之與夫先事而為計者則有間矣不  
習而有為與夫素得之者則有間矣予故采於越得公  
所推行樂為之識其詳豈獨以慰越人之思將使吏之  
有志於民者不幸而遇歲之蓄推公之所已試其科條  
可不待頃而具則公之澤豈小且近乎公元豐二年以

大學士加太子少保致仕家於衢具直道正行在於朝廷豈弟之實在於身者此不著著其荒政可師者以爲越州趙公救菑記云

絕大經濟得大手筆叙之更可法可傳○是時救荒美政推趙公之在越州富公之在青州有心斯民者所宜核考而健記之

書魏鄭公傳

曾 鞏

予觀太宗嘗屈已以從羣臣之議而魏鄭公之徒喜遭

其時感知已之遇事之大小無不諫諍雖其忠誠自至亦得君以然也則思唐之所以治太宗之所以稱賢主而前世之君不及者其淵源皆出於此也能知其有此者以其書存也及觀鄭公以諫諍事付史官太宗怒之薄其恩禮失終始之義則未嘗不反覆嗟惜恨其不思而益知鄭公之賢焉夫君之使臣與臣之事君者何大公至正之道而已矣大公至正之道非滅人言以掩已過取小亮以私其君此其不可者也又有甚不可者夫

以諫諍為當掩是以諫諍為非美也則後世誰復當諫  
諍乎況前代之君有納諫之美而後世不見則非惟失  
一時之公將使後世之君謂前代無諫諍之事是啓其  
怠且忌矣太宗末年羣下既知此意而不言漸不知天  
下之得失至於遼東之敗而始恨鄭公不在世未嘗知  
其悔之萌芽出於此也夫伊尹周公何如人也伊尹周  
公之諫切其君者其言至深而其事至迫存之於書未  
嘗掩焉至今稱太甲成王為賢君而伊尹周公為良相



者以其可見也令當時削而棄之成區區之小讓則後世何所據依而諫又何以知其賢且良與桀紂幽厲始皇之亡則其臣之諫詞無見焉非其史之遺乃天下不敢言而然也則諫諍之無傳乃此數君之所以益暴其惡於後世而已矣或曰春秋之法為尊親賢者諱與此戾矣夫春秋之所以諱者惡也納諫諍豈惡乎然則焚藁者非歟曰焚藁者誰歟非伊尹周公為之也近世取區區之小亮者為之耳其事又未是也何則以焚其稿

為掩君之過而使後世傳之則是使後世不見藁之是非而必具過常在於君美常在於已也豈愛其君之謂歟孔光之去其藁之所言其在正邪未可知也而焚之而惑後世庸詎知非謀已之奸計乎或曰造辟而言詭辭而出異乎此曰此非聖人之所曾言也今萬一有是理亦謂君臣之間議論之際不欲漏其言於一時之人耳豈杜其告萬世也噫以誠信待已而事其君而不欺乎萬世者鄭公也益知其賢云豈非然哉豈非然哉

以直諫為揚已之短而不知納諫正所以成已之聖  
故舜至聖也而益戒以無怠無荒禹戒以慢遊傲虐  
況其他乎太宗之所以致治全在賞諫臣而虛心納  
諫南豐此論曲折盡透此范貫之奏議序更曲暢

義田記

錢公輔

范文正公蘇人也平生好施與擇其親而貧疎而賢者  
咸施之方貴顯時置負郭常稔之田千畝號曰義田以  
養濟羣族之人日有食歲有衣嫁娶凶葬皆有贍擇族

之長而賢者主其計而時其出納焉族之聚者九十口  
歲入給稻八百斛以其所入給其所聚沛然有餘而無  
窮屏而家居俟代者與焉仕而居官者罷莫給此其大  
較也初公之未貴顯也嘗有志於是矣而力未逮者二  
十年既而為西帥及參大政於是始有祿賜之入而終  
其志公既沒後世子孫修其業承其志如公之存也公  
雖位充祿厚而貧終其身歿之日身無以為斂子無以  
為喪惟以施貧活族之義遺其子而已昔晏平仲敝車

羸馬桓子曰是隱君之賜也晏子曰自臣之貴父之族  
無不乘車者母之族無不足於衣食者妻之族無凍餒  
者齊國之士待臣而舉火者三百餘人如此而為隱君  
之賜乎彰君之賜乎於是齊侯以晏子之觴而觴桓子  
予嘗愛晏子好仁齊侯知賢而桓子服義也又愛晏子  
之仁有等級而言次第也先父族次母族次妻族而後  
及其疎遠之賢孟子曰親親而仁民仁民而愛物晏子  
為近之今觀文正公之義田賢於平仲其規模遠舉又

疑過之嗚呼世之都三公位享萬鍾祿其邸第之雄車  
輿之飾聲色之多妻孥之富止乎一已而已而族之人  
不得其門者豈少也哉況於施賢乎其下為卿為大夫  
為士廩稍之充奉養之厚止乎一已而已而族之人操  
壺瓢為溝中瘠者又豈少哉況於他人乎是皆公之罪  
人也公之忠義滿朝廷事業滿邊隅功名滿天下後世  
必有史官書之者予可無錄也獨高其義因以遺其世  
云

文正公仁孝之心從本原發出直貫至千百年故義  
田歷久規模不廢若稍有近名徇外之心則不久而  
爭且廢矣叙論明暢可化鄙薄為寬敦

慈溪縣學記

王安石

天下不可一日而無政教故學不可一日而亡於天下  
古者井天下之田而黨庠遂序國學之法立乎其中鄉  
射飲酒春秋合樂養老勞農尊賢使能攷藝選言之政  
至於受成獻馘訊囚之事無不出於學於此養天下智

仁聖義忠和之士以至一偏一伎一曲之學無所不養而又取士大夫之材行完潔而其施設已嘗試於位而去者以為之師釋奠釋菜以教不忘其學之所自遷徙逼逐以勉其怠而除其惡則士朝夕所見所聞無非所以治天下國家之道其服習必於仁義而所學必皆盡其材一日取以備公卿大夫百執事之選則其材行皆已素定而士之備選者其施設亦皆素所見聞而已不待閱習而後能者也古之在上者事不慮而盡功不為



而足其要如此而已此二帝三王所以治天下國家而  
立學之本意也後世無井田之法而學亦或存或廢大  
抵所以治天下國家者不復皆出于學而學之士羣居  
族處為師弟子之位者講章句課文字而已至其陵夷  
之久則四方之學者廢而為廟以祀孔子於天下斲木  
搏土如浮屠道士法為王者象州縣吏春秋帥其屬釋  
奠於其堂而學士者或不預焉蓋廟之作出於學廢而  
近世之法然也今天子即位若干年頗修法度而革近

世之不然者當此之時學稍稍立於天下矣猶曰州之士滿二百人乃得立學於是慈溪之士不得有學而為孔子廟如故廟又壞不治今劉君在中言於州使民出錢將修而作之未及為而去時慶厯某年也後林君肇至則曰古之所以為學者吾不得而見而法者吾不可以無循也雖然吾之人民於此不可以無教即因民錢作孔子廟如今之所云而治其四旁為學舍講堂其中帥縣之子弟起先生杜君醇為之師而興於學噫林君

其有道者耶夫吏者無變今之法而不失古之實此有  
道者之所能也林君之為其幾于此矣林君固賢令而  
慈溪小邑無珍產滯貨以來四方遊販之民田桑之美  
有以自足無水旱之憂也無遊販之民故其俗一而不  
雜有以自足故人慎刑而易治而吾所見其邑之士亦  
多美茂之材易成也杜君者越之隱君子其學行宜為  
人師者也夫以小邑得賢令又得宜為人師者為之師  
而以修醇一易治之俗而進美茂易成之材雖拘於法

限於勢不得盡如古之所為吾固信其教化之將行而風俗之成也夫教化可以美風俗雖然必久而後至於善而今之吏其勢不能以久也吾雖喜且幸其將行而又憂夫來者之不能繼也于是本其意以告來者

前半論學處與子固宜黃一樣介甫特欲為簡括之筆耳○曾王之文始用長句不古不時自是創體然王雖長句猶有峭勁氣曾則以平達勝也

周禮義序

王安石

士弊於俗學久矣聖上閔焉以經術造之乃集儒臣訓  
釋厥旨將播之校學而臣某實董周官惟道之在政事  
其貴賤有位其後先有序其多寡有數其遲數有時制  
而用之存乎法推而行之存乎人其人足以任官其官  
足以行法莫盛乎成周之時其法可施於後世其文有  
見於載籍莫具乎周官之書蓋其因習以崇之賡續以  
終之至於後世無以復加則豈特文武周公之力哉猶  
四時之運陰陽積而成寒暑非一日也自周之衰以至

於今歷歲千數百矣太平之遺迹掃蕩幾盡學者所見無復全經於是時也乃欲訓而發之臣誠不自揆然知其難也以訓而發之為難則又以知夫立政造事追而復之之為難然竊觀聖上致法就功取成於心訓迪在位有馮有翼疊疊乎鄉六服承德之世矣以所觀乎今考所學乎古所謂見而知之者臣誠不自揆妄以為庶幾焉故遂昧冒自竭而忘其材之弗及也謹列其書為二十有二卷凡十餘萬言上之御府

筆力斬然却極委婉

詩義序

王安石

詩三百十一篇其義具存其辭亡者六篇而已上既使臣雋訓其辭又命臣某等訓其義書成以賜太學布之天下又使臣某為之序謹拜手稽首言曰詩上通乎道德下止乎禮義放其言之文君子以興焉循其道之序聖人以成焉然以孔子之門人賜也商也有得于一言則孔子悅而進之蓋其說之難明如此則自周衰以迄

于今氓民紛紛豈不宜哉伏惟皇帝陛下內德純茂則神罔時恫外行恂達則四方以無侮日就月將學有緝熙于光明則頌之所形容蓋有不足道也微言奧義既自得之又命承學之臣訓釋厥遺樂與天下共之顧臣等所聞如燭火焉豈足以賡日月之餘光姑承明制代匱而已傳曰美成在久故棫樸之作人以壽考為言蓋將有來者焉追琢其章繡聖志而成之也臣衰且老矣尚庶幾及見之謹序



絕大題目兼係應制之作却以簡峭之筆出之又極得體存之以藥浮冗

祭范潁州文

王安石

嗚呼我公一世之師由初迄終名節無疵明肅之盛身危志殖瑤華失位又隨以斥治功亟聞尹帝之都閉女興良稚子歌呼赫赫之家萬首俯趨獨緘其私以走江湖士爭留公蹈禍不憚有危其辭謁與俱出風俗之衰駭正怡邪蹇蹇我初人以疑嗟力行不回慕者興起儒

先酋酋以節相侈公之在貶愈勇為忠稽前引古誼不  
營躬外更三州施有餘澤如醲河江以灌尋尺宿賊自  
解不以刑加猾盜涵仁終老無邪講藝絃歌慕來千里  
溝川障澤田桑有喜戎孽獬狂敢齟我疆鑄印刻符公  
屏一方取將於伍後常名顯收士至佐維邦之彥聲之  
所加虜不敢瀕以其餘威走敵完鄰昔也始至瘡痍滿  
道藥之養之内外完好既其無為飲酒笑歌百城晏眠  
吏士委蛇上嘉曰材以副樞密稽首辭讓至于六七遂

叅宰相釐我典常扶賢贊傑亂穴除荒官更於朝士變  
於鄉百治具修偷墮勉強彼闕不遂歸侍帝側卒屏于  
外身屯道塞謂宜耆老尚有以為神乎孰忍使至于斯  
蓋公之才猶不盡試肆其經綸功孰與計自公之貴廐  
庫逾空和其色辭傲訐以容化于婦妾不靡珠玉翼翼  
公子敝綈惡粟閔死憐窮惟是之奢孤女以嫁男成厥  
家孰埋於深孰鏤乎厚其傳其詳以法永久碩人今亡  
邦國之憂矧鄙不肖辱公知尤承凶萬里不往而留涕

哭馳辭以贊醪羞

范公亦立法度以變易天下者觀其所上十事條目  
不少于介甫新法也故荆公契合獨深贊頌倍至然  
范公所立法皆為天下人心風俗起見養才黜奸心  
事如白日青天荆公所立法多為謀利富國起見褊  
迫而用小人附已者此其所以大不同也祭文特雅  
峭摹寫范公曲盡余愛范公故樂誦荆公此文

祭歐陽文忠公文

王安石

夫事有人力之可致猶不可期況乎天理之冥冥又安  
可得而推惟公生有聞於當時死有傳於後世苟能如  
此足矣而亦又何悲如公器質之深厚智識之高遠而  
輔以學術之精微故充於文章見於議論豪健俊偉怪  
巧瑰琦其積於中者浩如江河之停蓄其發於外者爛  
如日星之光輝其清音幽韻淒如飄風急雨之驟至其  
雄辭閎辨快如輕車駿馬之奔馳世之學者無間乎識  
與不識而讀其文則其人可知嗚呼自公仕宦四十餘

年上下往復感世路之崎嶇雖遭困躓竄斥流離而終不可掩者以其公議之是非既壓復起遂顯於世果敢之氣剛正之節至晚而不衰方仁宗皇帝臨朝之末年顧念後事謂如公者可寄以社稷之安危及夫發謀決策從容指顧立定大計謂千載而一時功名成就不居而去其出處進退又庶乎英魄靈氣不隨異物腐散而長在乎箕山之側與潁水之湄然天下之無賢不肖且猶為涕泣而歔歔而沉朝士大夫平昔游從又予心

之所嚮慕而瞻依嗚呼盛衰興廢之理自古如此而臨  
風想望不能忘情者念公之不可復見而其誰與歸  
介甫初賴歐公游揚聲譽遂得顯名及其柄政日懼  
公沮新法毀之上前曰此人在一國則壞一國在一  
郡則壞一郡蓋忌其復用沮法也及歐公歿良心復  
萌祭文特佳故錄之

泰州海陵縣主簿許君墓誌銘

王安石

君諱平字秉之姓許氏余嘗譜其世家所謂今泰州海

陵縣主簿者也君既與兄元相友愛稱天下而自少卓犖不羈善辨說與其兄俱以智畧為當世大人所器寶元時朝廷開方畧之選以招天下異能之士而陝西大帥范文正公鄭文肅公爭以君所為書以薦於是得召試為太廟齋郎已而選泰州海陵縣主簿貴人多薦君有大才可試以事不宜棄之州縣君亦常慨然自許欲有所為然終不得一用其智能以卒噫其可哀也已士固有離世異俗獨行其意罵譏笑侮困辱而不悔彼皆



無衆人之求而有所待於後世者也其齟齬固宜若夫  
智勇功名之士窺時俯仰以赴勢物之會而輒不遇者  
乃亦不可勝數辯足以移萬物而窮於用說之時謀足  
以奪三軍而辱於右武之國此又何說哉嗟乎彼有所  
待而不遇者其知之矣君年五十九以嘉祐某年某月  
某甲子葬真州之揚子縣甘露鄉某所之原夫人李氏  
子男瓌不仕璋真州司戶參軍琦太廟齋郎琳進士女  
子五人已嫁二人進士周奉先泰州泰興縣令陶舜元

銘曰有拔而起之莫擠而止之嗚呼許君而已於斯誰或使之

富貴不能淫貧賤不能移威武不能屈孟子所謂大  
丈夫也介甫剛褊私妄於廣居正位大道之云曷嘗  
有當哉然粗論其氣槩則於此三句似亦可無愧如  
此文位置既高筆力超絕余謂讀介甫之文者但取  
其高志毅力以潛心遜志體道而致中何不可之有  
古文雅正卷十一

欽定四庫全書

集部

古文雅正卷十二

詳校官石中允臣薩敏

主事銜臣徐以坤覆勘

總校官庶吉士臣朱鈐

校對官編修臣王汝嘉

謄錄監生臣陳汝光

欽定四庫全書

古文雅正卷十二

禮部侍郎蔡世遠編

上殿劄子

明道程子

臣伏謂君道之大在乎稽古正學明善惡之歸辨忠邪之分曉然趨道之正故在乎君志先定君志定而天下之治成矣所謂定志者一心誠意擇善而固執之也夫義理不先盡則多聽而易惑志意不先定則守善而或

移惟在以聖人之訓為必當從先王之治為必可法不為後世駁雜之政所牽制不為流俗因循之論所遷惑自知極於明信道極於篤任賢勿貳去邪勿疑必期致世如三代之隆而後已也然天下之事患常生於忽微而志亦戒乎漸習是故古之人君雖出入從容閒燕必有誦訓箴諫之臣左右前後無非正人所以成其德業伏願陛下禮命老成賢儒不必勞以職事俾日親便座講論道義以輔聖德又擇天下賢俊使得陪侍法從朝

夕延見開陳善道講磨治體以廣聞聽如是則聖智益明王猷允塞矣今四海靡靡日入偷薄末俗嘒嘒無復廉恥蓋亦朝廷尊德樂道之風未孚而篤誠忠厚之教尚鬱也惟陛下稽聖人之訓法先王之治一心誠意體乾剛健而力行之則天下幸甚

此等文字是大人格君第一要著坐而言即可起而行論王霸劄子所以大其規模此所以培其根本也  
○三代以下最可惜機會是宋神宗時以神宗有致

治之銳心諸臣如程張司馬等皆非三代以下人物  
乃為介甫所誤諸賢廢棄惜哉吾得之胡敬齋云

請修學校尊師儒取士劄子

明道程子

臣伏謂治天下以正風俗得賢才為本宋興百餘年而  
教化未大醇人情未盡美士人微謙退之節鄉閭無廉  
恥之行刑雖繁而奸不止官雖冗而材不足者此蓋學  
校之不修師儒之不尊無以風勸養勵之使然耳竊以  
去聖久遠師道不立儒者之學幾於廢熄惟朝廷崇尚

教育之道則不日而復古者一道德以同俗苟師學不正則道德何從而一方今人執私見家為異說支離經訓無復統一道之不明不行乃在於此臣謂宜先禮命近侍賢儒各以類舉及百執事方岳州縣之吏悉心推訪凡有明先王之道德業克備足為師表者其次有篤志好學材良行修者皆以名聞其高蹈之士朝廷當厚禮延聘其餘命州縣敦遣萃於京師館之寬閒之宇豐其廩餼卹其家之有無以大臣之賢典領其事俾羣儒



朝夕相與講明正學其道必本於人倫明乎物理其教  
自小學灑掃應對以往修其孝悌忠信周旋禮樂其所  
以誘掖激勵漸摩成就之道皆有節序其要在於擇善  
修身至於化成天下自鄉人而可至於聖人之道其學  
行皆中於是者為成德又其次取材識明達可進於善  
者使日授其業稍久則舉其賢傑以備高任擇其學業  
大明德義可尊者為太學之師次以分教天下之學始  
自藩府至於列郡擇士之願學民之俊秀者入學皆優

其廩給而蠲其身役凡具有父母骨肉之養者亦通其  
優游往來以察其行其大不率教者斥之從役漸自大  
學及州郡之學擇其道業之成可為人師者使教於學  
縣之學如州郡之制異日則十室之鄉達於黨遂皆當  
修其庠序之制為之立師學者以次而察焉縣令每歲  
與學之師以鄉飲之禮會其鄉老學者衆推經明行修  
材能可任之士升於州之學以觀其實學荒行虧者罷  
歸而罪其吏與師其升於州而當者復其家之役郡守

又歲與學之師行鄉飲酒之禮大會郡士以經義性行材能三物賓興其士於太學太學又聚而教之其學不明行不修與材之下者罷歸以為郡守學師之罪升於太學者亦聽其以時還鄉里復來於學太學歲論其賢者能者於朝謂之選士朝廷問之經以考其言試之職以觀其材然後辨論其才差而命之秩凡處郡縣之學者皆滿三歲然後得充薦其自州郡升於太學者一歲而後薦其有學行超卓衆所信服者雖未處於學或處

學而未久亦得備數論薦凡選士之法皆以性行端潔  
居家孝悌有廉恥禮遜通明學業曉達治道者凡公卿  
大夫子弟皆入學在京師者入太學在外者各入其所  
在州之學謂之國子其有當補廕者並如舊制惟不選  
於學者不授以職臣謂既一以道德仁義教育之又專  
以行實材學升進之去其聲律小碎糊名騰錄一切無  
義理之弊不數年間學者靡然丕變矣豈惟得士浸廣  
天下風俗將日入醇正王化之本也臣謂帝王之道莫

尚於此願陛下特留宸意為萬世行之

董江都賢良三策重教化一學術可謂美矣程子此篇規模廣大法度詳明下語切至尤可以坐而言起而行也胡敬齋謂此篇規模比朱子貢舉私議更廣大可行諒哉○北宋文質厚南宋文軟暢此篇氣味不惟直逼西京且追周官之遺經術學術之闕于文章也大哉○先博訪名儒萃於京師講明教授然後擇其賢者以主太學及藩府列郡之學又就郡學中

擇其賢者以主列縣之學而升之州郡之京師試而  
官之條理井然

荅橫渠論定性書

明道程子

承教諭以定性未能不動猶累於外物此賢者慮之熟  
矣尚何俟小子之言然嘗思之矣敢貢其說于左右所  
謂定者動亦定靜亦定無將迎無內外苟以外物為外  
牽已而從之是以己性為有內外也且以性為隨物於  
外則當其在外時何者為在內是有意於絕外誘而不

知性之無內外也既以內外為二本則又烏可遽語定哉夫天地之常以其心普萬物而無心聖人之常以其情順萬事而無情故君子之學莫若廓然而大公物來而順應易曰貞吉悔亡憧憧往來朋從爾思苟規規于外誘之除將見滅於東而生於西也非惟日亦不足顧其端無窮不可得而除也人之心各有所蔽故不能適道大率患在於自私而用智自私則不能以有為為應迹用智則不能以明覺為自然今以惡外物之心而求

照無物之地是反鑑而索照也易曰艮其背不獲其身  
行其庭不見其人孟氏亦曰所惡于智者為其鑿也與  
其非外而是內不若內外之兩忘也兩忘則澄然無事  
矣無事則定定則明明則尚何應物之為累哉聖人之  
喜以物之當喜聖人之怒以物之當怒是聖人之喜怒  
不繫於心而繫於物也是則聖人豈不應於物哉烏得  
以從外者為非而更求在內者為是也今以自私用智  
之喜怒而視聖人喜怒之正為如何哉夫人之情易發



而難制者惟怒為甚第能于怒時遽忘其怒而觀理之  
是非亦可見外誘之不足惡而於道亦思過半矣心之  
精微口不能宣加之素拙於文辭又吏事匆匆未能精  
慮當否佇報然舉大要亦當近之矣道近求遠古人所  
非惟聰明裁之

張子苦心力索之功多涵泳完養之功少明道示以  
定性之學包內外兼體用此歷聖傳心之要也篇中  
却未說出工夫工夫何在曰戒懼慎獨以致中和而

已吾性定而天地萬物位育矣自私自用智鑿性之病  
根在此正與中和反看七情中獨指出怒一端言之  
蓋以怒最易壞性也朱子解云忘怒則公觀理則順  
又程子平日嘗曰克己可以治怒明理可以治懼當  
與叅看

論經筵劄子

伊川程子

古之人君守成業而致盛治者莫如周成王其所以成  
德則由乎周公周公之輔成王也幼而習之所見必正

事所聞必正言左右前後皆正人故習與性長化與心成今陛下春秋方富輔養之道不可不至也所謂輔養之道非謂告詔以言過而後諫也尤在涵養薰陶之而已矣今夫一日之間接賢士大夫之時多親寺人宦官之時少則氣質自化德器自成臣欲謹選賢德之士以侍勸講講讀既罷常留以備訪問從容燕語不獨漸磨德義至於人情物態稼穡艱難日積既久自然通達比之深處宮闈為益多矣夫傳德義者在乎防聞見之非

節嗜慾之過保身體者在乎適起居之宜存畏謹之心  
故左右近侍宜選老成重厚小心之人服飾器用皆須  
朴質之物俾華巧靡麗不至於前淺俗之言不入於耳  
凡動作言語必使勸講者知之庶幾隨事箴規應時諫  
正調護聖躬莫過於此矣人君居崇高之位持威福之  
柄百官畏懼而莫敢仰視萬方崇奉而所欲必得苟非  
知道畏義所養如此其成則中常之君無不驕肆英明  
之主自然滿假此古今同患治亂所由也

秦漢以下諸儒告君文字有能說得如此平實該贍純粹無罅者否伊訓說命差堪比擬○伊川先生上仁宗書時年方十八勸仁宗以王道為心生民為念志則大矣然下手工夫尚未著實至代太中上英宗皇帝書分為立志用賢責任深切懇到與經筵等疏字字可見之施行誠內聖外王本領學以年進又貴深造不已信哉○案先生集中有乞再上殿論經筵事劄子又進劄子三道此括三道之意為一篇乃粹

言本也貼黃云天下重任唯宰相與經筵天下治亂  
係宰相君德成就責經筵可謂深切著明

顏子所好何學論

伊川程子

聖人之門其徒三千獨稱顏子為好學夫詩書六藝七  
十子非不習而通也然則顏子所獨好者何學也學以  
至聖人之道也聖人可學而至歟曰然學之道如何曰  
天地儲精得五行之秀者為人其本也真而靜其未發  
也五性具焉曰仁義禮智信形既生矣外物觸其形而

動于中矣其中動而七情出焉曰喜怒哀樂愛惡欲情  
既熾而益蕩其性鑿矣是故覺者約其情使合於中正  
其心養其性故曰性其情愚者則不知制之縱其情而  
至於邪僻梏其性而亡之故曰情其性凡學之道正其  
心養其性而已中正而誠則聖矣君子之學必先知明諸  
心知所養然後力行以求至所謂自明而誠也故學必  
盡其心盡其心則知其性知其性反而誠之聖人也故  
洪範曰思曰睿睿作聖誠之道在乎信道篤信道篤

則行之果行之果則守之固仁義忠信不離乎心造次必於是顛沛必於是出處語默必於是久而弗失則居之安動容周旋中禮而邪僻之心無自生矣故顏子所事則曰非禮勿視非禮勿聽非禮勿言非禮勿動仲尼稱之則曰得一善則拳拳服膺而弗失之矣又曰不遷怒不貳過有不善未嘗不知知之未嘗復行也此其好之篤學之之道也視聽言動皆禮矣所異于聖人者蓋聖人則不思而得不勉而中從容中道顏子則必思而



後得必勉而後中故曰顏子之與聖人相去一息孟子  
曰充實而有光輝之謂大大而化之之謂聖聖而不可  
知之謂神顏子之德可謂充實而有光輝矣所未至者  
守之也非化之也以其好學之心假之以年則不日而  
化矣故仲尼曰不幸短命死蓋傷其不得至於聖人也  
所謂化之者入於神而自然不思而得不勉而中之謂  
也孔子曰七十而從心所欲不踰矩是也或曰聖人生  
而知之者也今謂可學而至具有稽乎曰然孟子曰堯

舜性之也湯武反之也性之者生而知之者也反之者  
學而知之者也又曰孔子則生而知也孟子則學而知  
也後人不達以謂聖本生知非學可至而為學之道遂  
失不求諸已而求諸外以博聞強記巧文麗辭為工榮  
華其言鮮有至於道者則今之學與顏子所好異矣  
篇中論顏子所好之學大約謂光明之心知所養而  
力行以求至於誠耳

擊壤集自序

邵子

擊壤集伊川翁自樂之詩也非惟自樂又能樂時與萬物之自得也伊川翁曰子夏謂詩者志之所之也在心為志發言為詩情動於中而形於言聲成其文而謂之音是知懷其時則謂之志感其物則謂之情發其志則謂之言揚其情則謂之聲言成章則謂之詩聲成文則謂之音然後聞其詩聽其音則人之志情可知之矣且情有七其要在二二謂身也時也謂身則一身体感也謂時則一時之否泰也一身之休感則不過貧富貴賤

而已一時之否泰則在夫興廢治亂者焉是以仲尼刪詩十去其九諸侯千有餘國風取十五西周十有二王雅取其六蓋垂訓之道善惡明著者存焉耳近世詩人窮感則職于怨懣榮達則專于淫佚身之休戚發于喜怒時之否泰出于愛惡殊不以天下大義而為言者故其詩大率溺于情好也噫情之溺人也甚于水古者謂水能載舟亦能覆舟是覆載在水也不在人也載則為利覆則為害是利害在人也不在水也不知覆載能使

人有利害耶利害能使水有覆載耶二者之間必有處  
焉就如人能踏水非水能踏人也然而有稱善踏者未  
始不為水之所害人若外利而踏水之情亦由人之情  
也若利內而踏水利而壞之患立至于前又何必分乎  
人焉水焉其傷性害命一也性者道之形體也性傷則  
道亦從之矣心者性之郭郭也心傷則性亦從之矣身  
者心之區宇也身傷則心亦從之矣物者身之舟車也  
物傷則身亦從之矣是知以道觀性以性觀心以心觀

身以身觀物治則治矣然猶未離乎害者也不若以道  
觀道以性觀性以心觀心以身觀身以物觀物則雖欲  
相傷其可得乎若然則以家觀家以國觀國以天下觀  
天下亦從而可知之矣予自壯歲業于儒術謂人世之  
樂何嘗有萬之一二而謂名教之樂固有萬萬焉況觀  
物之樂復有萬萬者焉雖生死榮辱轉戰于前曾未入  
于胸中則何異四時風花雪月一過乎眼也誠為能以  
物觀物而兩不相傷者焉蓋其間情累都忘去爾所未

忘者獨有詩在焉然而雖曰未忘其實亦若忘之矣何者謂其所作異人之所作也所作不限聲律不沿美惡不立固必不希名譽如鑑之應形如鐘之應聲其或經道之餘因靜照物因時起志因物寓言因志發詠因言成詩因詠成聲因詩成音是故哀而未嘗傷樂而未嘗淫雖曰吟咏性情曾何累于情哉鐘鼓樂也玉帛禮也與其嗜鐘鼓玉帛則斯言也不能無陋矣必欲廢鐘鼓玉帛則其如禮樂何人謂風雅之道行于古而不行于

今殆非通論牽于一身而為言者也吁獨不念天下為善者少害善者多造危者衆而持危者寡志士在畎畝則以畎畝言故其詩名之曰伊川擊壤集

朱子曰諸先生說這道理却不似邵子說得最著實邵子忽自於擊壤序內說出幾句云性者道之形體也心者性之郭郭也身者心之區宇也物者身之舟車也此說極好較之橫渠心統性情尤密又云不易之論此等語秦漢以下人道不到又云康節這數句



極好蓋道即理也如父子有親君臣有義是也然非性何以見理之所在故曰道之形體仁義禮智性也理也而具此理者心也故曰心者性之郭郭又云以道觀性者道是自然底道理性則有剛柔善惡參差不齊處是道不能以該盡此性也性有仁義禮智之善心却千思萬慮出入無時是性不能以該盡此心也心欲如此而身却不能如此是心有不能檢其身處以一身而觀物亦有不能盡其情狀變態此則未

離乎害之意也且以一事言之若好人之所好惡人之所惡是以觀物者也又或問以道觀道等語是物各付物之意否曰然蓋自家都不犯手之意

進資治通鑑表

初進通志八卷英宗悅之命公續其書十五年而成上之

司馬光

先奉勅編集歷代君臣事迹又奉聖旨賜名資治通鑑今已了畢者伏念臣性識愚魯學術荒疎凡百事為皆出人下獨於前史粗嘗盡心自幼至老嗜之不厭每患遷固以來文字繁多自布衣之士讀之不徧況於人主

日有萬幾何暇周覽臣嘗不自揆欲刪削冗長舉其大要取關國家興衰繫生民休戚善可為法惡可為戒者為編年一書使先後有倫精粗不雜私家力薄無由可成伏遇英宗皇帝資睿智之性敷文明之治思歷覽古事用恢張大猷爰詔下臣俾之編集臣夙昔所願一朝獲伸踴躍奉承惟懼不稱先帝仍命自選辟官屬於崇文院置局許借龍圖天章閣三館秘閣書籍賜以御府筆墨繒帛及御前錢以供果餌以內臣為承受眷遇之

榮近臣莫及不幸書未進御先帝遺棄羣臣陛下紹膺  
大統欽承先志寵以冠序錫之嘉名每開經筵常令進  
讀臣雖頑愚荷兩朝知待如此其厚隕身喪元未足報  
塞苟智力所及豈敢有遺會差知永興軍以衰疾不任  
治劇乞就冗官陛下俯從所欲曲賜容養差判西京留  
司御史臺及提舉嵩山崇福宮前後六任仍聽以書局  
自隨給之祿秩不責職業臣既無他事得以研精極慮  
窮竭所有日力不足繼之以夜徧閱舊史旁採小說簡

牘盈積浩如煙海抉摘幽隱校計毫釐上起戰國下終  
五代凡一千三百六十二年修成二百九十四卷又畧  
舉事目年經國緯以備檢尋為目錄三十卷又參考羣  
書詳其同異俾歸一塗為考異三十卷合三百五十四  
卷自治平開局迄今始成歲月淹久其間抵牾不敢自  
保罪負之重固無所逃重念臣違離闕庭十有五年雖  
身處於外區區之心朝夕寤寐何嘗不在陛下左右顧  
以駑蹇無施而可是以專事鉛槧用酬大恩庶竭涓塵

少俾海岳臣今筋骸癰痺目視昏近齒牙無幾神識衰  
耗目前所為旋踵遺忘臣之精力盡於此書伏望陛下  
寬其妄作之誅察其願忠之意以清閒之燕時賜省覽  
監前世之興衰考當今之得失嘉善矜惡取是捨非足  
以懋稽古之盛德躋無前之至治俾四海羣生咸蒙其  
福則臣雖委骨九泉志願永畢矣謹奉表陳進以聞  
自叙編校苦心要歸總欲神宗留意監古讀至末段  
忠君愛國之心情見乎詞與著書立說誇耀後世者

不可同年而語矣其文氣懇切古茂直逼兩京宋人  
少有也○溫公作通鑑其功不在左氏下朱子因之  
為綱目其功不在春秋下千百世治亂興衰得失具  
見於此切已讀之所以長益經濟啓發忠義者不少  
名為讀書人而二書有不及見者可不謂大哀乎

答程子書

司馬光

承問及張子厚謚倉卒奉對以漢魏以來此例甚多無  
不可者退有所未盡竊惟子厚平生用心欲率今世之

人復三代之禮者也漢魏以下益不足法郊特牲曰古者生無爵死無謚爵謂大夫以上者檀弓記禮所由失以爲士之有誄自縣貢父始子厚官比諸侯之大夫則已貴宜有謚矣然曾子問賤不誄貴幼不誄長禮也唯天子稱天以誄之諸侯相稱非禮也況弟子而誄其師乎孔子之沒哀公誄之不聞弟子復爲之謚也子路欲使門人爲臣孔子以爲欺天門人厚葬顏淵孔子嘆不得視猶子也君子愛人以禮今關中諸君欲謚子厚而



不合於古禮非子厚之志與其以陳文範陶靖節王文  
中孟貞曜為比其尊之也曷若以孔子為比乎

簡而茂樸而有華東京以返無此風標○溫公奏疏  
史論甚多忠睿明暢有關治要獨選此最古淡一篇  
此等文筆在宋朝推為絕調且足見程張司馬邵呂  
文富諸君子之相聚不偶然也嗚呼令人神往矣

論聽政

宣仁太后崩祖禹慮小  
人乘間害政乃上疏

范祖禹

臣等伏以天下不幸大行太皇太后登遐陛下號慕哀

毀孝性天至在廷聞者無不摧隕今總覽庶政延見羣臣四方之民傾耳而聽拭目而視此乃宋室隆替之本社稷安危之基天下治亂之端生民休戚之始君子小人消長進退之際天命人心去就離合之時也嗚呼可不慎哉可不慎哉臣等久備講讀職在論思首當獻言以助萬一陛下宜先誠意正心推廣聖孝發為德音行為仁政以懌答天下生民之望昔周公以成王幼弱故位冢宰治天下七年制禮作樂以致太平周公歿成王

追念其勛勞賜魯天子禮樂使世世祀周公天下莫不  
歸心漢大將軍霍光尊立宣帝霍光既歿宣帝亦葬以  
天子之禮帝始親政事又思報大將軍功德夫周公霍  
光皆人臣也有非常之功故成王宣帝皆報以非常之  
禮而況太皇太后英宗之配神宗之母陛下之祖母有  
大功于宗廟社稷有大德於億兆人民於陛下之恩與  
天地無極豈人臣之比哉然則今陛下所宜先者莫如  
報太皇太后之德也自仁宗以來三后臨朝皆有大功

章獻明肅之於仁宗慈聖光獻之於英宗鞠育扶持勤勞艱難亦未得如太皇太后之於陛下也元豐之末神宗寢疾已不能出號令陛下年始十歲太皇太后內定大策擁立陛下儲位遂定陛下之有天下乃得之於太皇太后也聽政之初詔令所下百姓無不歡呼鼓舞自古母后多私外家惟太皇太后未嘗有毫髮假借族人  
不惟族人而已徐王魏王皆親子也以朝廷之故疎遠  
隔絕魏王病既沒然後一往太皇太后疾已革然後徐

王得入進退羣臣必從天下人望不以己意為喜怒賞  
罰焦勞刻苦以念生民凡皆為趙氏社稷宋室宗廟專  
心一意以保佑陛下也陛下如欲報太皇太后之德莫  
若循其法度而謹守之祖宗以來唯以德澤結百姓之  
心欲四海安靜無事仁宗行之四十二年天下至今思  
之恭惟太皇太后之政事乃仁宗之政事也然而仁宗  
聖性寬裕不忍拒人內降濫恩其後亦比比而有惟太  
皇太后嚴正至靜不可干犯故能外斥逐奸邪以清朝

廷內裁抑僥倖以肅宮禁故雖德澤深厚結於百姓而  
小人怨者亦不為少矣今必有小人進言曰太皇太后  
不當改先帝之政逐先帝之臣此乃離間之言陛下不  
可不察也當陛下嗣位之初太皇太后同聽政中外臣  
民上書者以萬數皆言政令有不便者太皇太后因天  
下人心欲改故與陛下同改之非以已之私意而改也  
既改其法則作法之人及主其法者有罪當逐陛下與  
太皇太后亦以衆言而逐之其所逐者皆上負先帝下

負萬民天下之所仇疾衆庶所欲同去者也太皇太后  
豈有憎愛於其間哉顧不如此則天下不安耳惟陛下  
清心照理辨察是非斥遠佞人深拒邪說有敢以姦言  
惑聖聽者明正其罪付之典刑痛懲一人以儆羣慝則  
帖然無事矣陛下若稍入其語不正其罪則恐奸言邪  
說繼進不已萬一追報之禮小有不至此於太皇太后  
聖德無損而於陛下孝道有虧必大失天下之心陛下  
豈不見司馬光以公忠正直為天下所信服陛下與太

皇太后用以為相海內之人無不欣悅光歿之日無不  
悲哀乃至茶坊酒肆之中亦事具畫像光所以得人心  
如此者為其能輔佐陛下與太皇太后功及天下也以  
光之功比之太皇太后止是萬分之一而百姓思之如  
此而況太皇太后有天地之恩於陛下若聽小人讒說  
或追報有所不至或輕改其政事豈不大失天下人心  
乎夫小人之情非為朝廷之計亦非為先帝之事皆為  
其身之利也日夜伺候欲逞其憾者久矣此等既上悞



先帝今又欲復悞陛下天下之事豈堪小人再破壞耶  
臣等恭聞陛下自太皇太后寢疾躬親藥膳衣不解帶  
變故以來哀慕毀瘠又下詔發揚太皇太后盛德推恩  
高氏至親之際無所間然然而臣等猶言及此者竊以  
小人衆多恐置陛下於有過之地也如臣等所言雖萬  
萬無之然不敢不慮於未然或有纖芥流聞於外則臣  
等上負陛下不先言之罪大矣不勝憂國愛君之至惟  
陛下深留聖思

當宣仁時元豐大臣洵洵秉機播弄范忠宣呂微仲  
已有調停之議宣仁崩諸君子知必不免宣仁臨終  
時數言亦知必不免也范公此疏正直委婉欲以先  
入之言早杜其萌篇中所言如親見後來紹述之禍  
而語語對針宜乎子瞻見此疏即自毀其稿列名以  
進也○古今第一可恨事莫如元祐之變為紹述指  
君子為小人空國貶竄亦已極矣甚至有欲追廢宣  
仁毀司馬公之棺者事雖不果足見鄙夫之心無所

不至不觀後來之禍不知此疏之佳處然公之心豈意其至此哉自古忠言讜論銷患于未形裨益人家國者莫可名言也

族譜引

蘇洵

蘇氏之譜譜蘇氏之族也蘇氏出自高陽而蔓延於天下唐神龍初長史味道刺眉州卒於官一子留於眉眉之有蘇氏自是始而譜不及焉者親盡也親盡則曷為不及譜為親作也凡子得書而孫不得書何也以著代

也自吾之父以及吾之高祖任不仕娶某氏享年幾某  
日卒皆書而他不書何也詳吾之所自出也自吾之父  
以至吾之高祖皆曰諱某而他則遂名之何也尊吾之  
所自出也譜為蘇氏作而獨吾之所自出得詳與尊何  
也譜吾作也嗚呼觀吾之譜者孝弟之心可以油然而  
生矣情見乎親親見於服服始於衰而至於總麻而至  
於無服無服則親盡親盡則情盡情盡則喜不慶憂不  
弔喜不慶憂不弔則塗人也吾之所以相視如塗人者

其初兄弟也兄弟其初一人之身也悲夫一人之身分而至於塗人此吾譜之所以作也其意曰分而至於塗人者勢也勢吾無如之何也已幸其未至於塗人也使之無至於忽忘焉可也嗚呼觀吾之譜者孝弟之心可以油然而生矣系之以詩曰吾父之子今為吾兄吾疾在身兄呻不寧數世之後不知何人彼死而生不為戚欣兄弟之情如足於手其能幾何彼不相能彼獨何心明允文章多難以縱橫刑名之習五經等論尤駁而

未純獨此篇效公轍體至性流露文筆委折可歌可  
誦即不必觀其譜讀其引孝悌之心有不油然而生  
乎○安溪先生嘗曰以父母之心為心則天下無不  
友之兄弟以祖宗之心為心則天下無不和之族人  
以天地之心為心則天下無不愛之民物此語最要  
切正易傳所謂體仁足以長人程子所謂滿腔惻隱  
者也余嘗書此語于祠堂以勉族人讀眉山斯引更  
為感動

范文正公文集序

蘇軾

慶歷三年軾始總角入鄉校士有自京師來者以魯人石守道所作慶歷聖德詩示鄉先生軾從旁竊觀則能誦習其詞問先生以所頌十一人者何人也先生曰童子何用知之軾曰此天人也耶則不敢知若亦人耳何為其不可先生奇軾言盡以告之且曰韓范富歐陽此四人者人傑也時雖未盡了則已私識之矣嘉祐二年始舉進士至京師則范公沒既葬而墓碑出讀之至流

涕曰吾得其為人蓋十有五年而不一見其面豈非命也歟是歲登第始見知於歐陽公因公以識韓富皆以國士待軾曰恨子不識范文正公其後三年過許始識公之仲子今丞相堯夫又六年始見其叔彛叟京師又十一年遂與其季德孺同僚於徐皆一見如舊且以公遺橐見屬為序又十三年乃克為之嗚呼公之功德蓋不待文而顯其文亦不待序而傳然不敢辭者自以八歲知敬愛公今四十七年矣彼三傑者皆得從之遊而



公獨不識以為平生之恨若獲挂名其文字中以自託於門下士之末豈非疇昔之願也哉古之君子如伊尹太公管仲樂毅之流其王伯之略皆素定於畎畝中非仕而後學者也淮陰侯見高帝於漢中論劉項短長畫取三秦如指諸掌及佐帝定天下漢中之言無一不酬者諸葛孔明卧草廬中與先主策曹操孫權規取劉璋因蜀之資以爭天下終身不易其言此豈口傳耳受嘗試為之而僥倖其或成者哉公在天聖中居太夫人憂

則已有憂天下致太平之意故為萬言書以遺宰相天下傳誦至用為將擢為執政考其平生所為無出此書者今其集二十卷為詩賦二百六十八為文一百六十五其於仁義禮樂忠信孝弟蓋如飢渴之於飲食欲須臾忘而不可得如火之熱如水之濕蓋其天性有不得不然者雖弄翰戲語率然而作必歸於此故天下信其誠爭師尊之孔子曰有德者必有言非有言也德之發於口者也又曰我戰則克祭則受福非能戰也德之見

於怒者也

余生平最喜諸葛公范文正公稱公之文亦酣玩不置陳壽上諸葛公文集表數百讀不厭蘇長公序范文正公亦數百讀不厭固以其文之佳亦以其人故也長公文以雄偉閎暢勝此篇更出以簡勁

六一居士集序

蘇軾

夫言有大而非夸達者信之衆人疑焉孔子曰天之將喪斯文也後死者不得與於斯文也孟子曰禹抑洪水

孔子作春秋而予距楊墨蓋以是配禹也文章之得喪何與於天而禹之功與天地並孔子孟子以空言配之不巳夸乎自春秋作而亂臣賊子懼孟子之言行而楊墨之道廢天下以為是固然而不知其功孟子既沒有申商韓非之學違道而趨利殘民以厚主其說至陋也而士以是罔其上上之人僥倖一切之功靡然從之而世無大人先生如孔子孟子者推其本末權其禍福之輕重以救其惑故其學遂行秦以是喪天下陵夷至於

勝廣劉項之禍死者十八九天下蕭然洪水之患蓋不  
至此也方秦之未得志也使復有一孟子則申韓為空  
言作於其心害於其事作於其事害於其政者必不至  
若是烈也使楊墨得志於天下其禍豈減於申韓哉由  
此言之雖以孟子配禹可也太史公曰蓋公言黃老賈  
誼晁錯明申韓錯不足道也而誼亦為之予以是知邪  
說之移人雖豪傑之士有不免者況衆人乎自漢以來  
道術不出於孔氏而亂天下者多矣晉以老莊亡梁以

佛亡莫或正之五百餘年而後得韓愈學者以愈配孟子蓋庶幾焉愈之後三百有餘年而後得歐陽子其學推韓愈孟子以達於孔氏著禮樂仁義之實以合於大道其言簡而明信而通引物連類折之於至理以服人心故天下翕然師尊之自歐陽子之存世之不說者譁而攻之能折困其身而不能屈其言士無賢不肖不謀而同曰歐陽子今之韓愈也宋興七十餘年民不知兵富而教之至天聖景祐極矣而斯文終有媿於古士亦

因陋守舊論卑而氣弱自歐陽子出天下爭自濯磨以通經學古為高以救時行道為賢以犯顏納諫為忠長育成就至嘉祐末號稱多士歐陽子之功為多嗚呼此豈人力也哉非天其孰能使之歐陽子沒十有餘年士始為新學以佛老之似亂周孔之真識者憂之賴天子明聖詔修取士法風厲學者專治孔氏黜異端然後風俗一變考論師友淵源所自復知誦習歐陽子之書予得其詩文七百六十六篇於其子棐乃次而論之曰歐

陽子論大道似韓愈論事似陸贄記事似司馬遷詩賦似李白此非余言也天下之言也歐陽子諱修字永叔既老自謂六一居士云

長公氣節文章照耀千古謂之知道則未也觀其推崇歐陽子不喜程正叔本領具見然讀此篇非具千古隻眼者不能是何等識力筆力

潮州韓文公廟碑

蘇軾

匹夫而為百世師一言而為天下法是皆有以參天地



之化闕盛衰之運其生也有自來其逝也有所為矣故  
申呂自嶽降而傳說為列星古今所傳不可誣也孟子  
曰我善養我浩然之氣是氣也寓於尋常之中而塞乎  
天地之間卒然遇之則王公失其貴晉楚失其富良平  
失其智賁育失其勇儀秦失其辯是孰使之然哉其必  
有不依形而立不恃力而行不待生而存不隨死而亡  
者矣故在天為星辰在地為河嶽幽則為鬼神而明則  
復為人此理之常無足怪者自東漢以來道喪大弊異

端並起歷唐貞觀開元之盛輔以房杜姚宋而不能救  
獨韓文公起布衣談笑而麾之天下靡然從公復歸於  
正蓋三百年於此矣文起八代之衰而道濟天下之溺  
忠犯人主之怒而勇奪三軍之帥此豈非參天地闡盛  
衰浩然而獨存者乎蓋嘗論天人之辨以謂人無所不  
至惟天不容偽智可以欺王公不可以欺豚魚力可以  
得天下不可以得匹夫匹婦之心故公之精誠能開衡  
山之雲而不能回憲宗之惑能馴鱷魚之暴而不能弭

皇甫鏞李逢吉之謗能信於南海之民廟食百世而不能使其身一日安於朝廷之上蓋公之所能者天也不能者人也始潮人未知學公命進士趙德為之師自是潮之士皆篤于文行延及齊民至於今號稱易治信乎孔子之言君子學道則愛人小人學道則易使也潮人之事公也飲食必祭水旱疾疫凡有求必禱焉而廟在刺史公堂之後民以出入為艱前守欲請諸朝作新廟不果元祐五年朝散郎王君滌來守是邦凡所以養

士治民者一以公為師民既悅服則出令曰願新公廟者聽民謹趨之卜地於州城之南七里期年而廟成或曰公去國萬里而謫於潮不能一歲而歸沒而有知其不眷戀於潮審矣軾曰不然公之神在天下者如水之在地中無所往而不在也而潮人獨信之深思之至庶蒿悽愴若或見之譬如鑿井得泉而曰水專在是豈理也哉元豐七年詔封公昌黎伯故榜曰昌黎伯韓文公之廟潮人請書其事於石因作詩以遺之使歌以祀公

上半總論韓文公後半方是潮州廟碑精力全注在  
上半後半只淡淡寫來耳。韓文公范文正公歐陽  
文忠公三大人物其碑記序文得蘇文忠公以崇論  
閎議精思浩氣構之大人物得此大手筆快哉

代張方平諫用兵書

蘇軾

臣聞好兵猶好色也傷生之事非一而好色者必死賊  
民之事非一而好兵者必亡此理之必然者也夫惟聖  
人之兵皆出於不得已故其勝也享安全之福其不勝

也必無意外之患後世用兵皆得已而不已故其勝也則變遲而禍大其不勝也則變速而禍小是以聖人不計勝負之功而深戒用兵之禍何者興師十萬日費千金內外騷動殆於道路者百千萬家內則府庫空虛外則百姓窮匱飢寒逼迫其次必有盜賊之憂死傷愁怨其終必致水旱之報上則將帥擁衆有跋扈之心下則士衆久役有潰叛之志變故百出皆由用兵至於興事首議之人冥謫尤重蓋以平民無故緣兵而死怨氣充

積必有任其咎者是以聖人畏之重之非不得已不敢用也自古人主好動干戈由敗而亡者不可勝數臣今不敢復言請為陛下言其勝者秦始皇既平六國復事吳越戍役之患被於四海雖拓地千里遠過三代而墳土未乾天下怨叛二世被害子嬰被擒滅亡之酷自古所未之有也漢武帝承文景富溢之餘首挑匈奴兵連不解遂使侵奪及於諸國歲歲調發所至成功建元之間兵禍始作是時蚩尤旗出長與天等其春戾太子生

自是師行三十餘年死者無數及巫蠱事起京師流血  
僵尸數萬太子父子皆敗故班固以為太子生長於兵  
與之終始帝雖悔悟自克而殁身之恨已無及矣隋文  
帝既下江南繼事夷狄煬帝嗣位此志不衰皆能誅滅  
彊國威震萬里然而兵怨盜起亡不旋踵唐太宗神武  
無敵尤喜用兵既已破滅突厥高昌吐谷渾等猶且未  
厭親駕遼東皆志在立功非不得已而用其後武氏之  
難唐室凌遲不絕如綫蓋用兵之禍物理難逃不然太



宗仁聖寬厚克已裕人幾至刑措而一傳之後子孫塗炭此豈為善之報也哉由此觀之漢唐用兵於寬仁之後故勝而僅存秦隋用兵於殘暴之餘故勝而遂滅臣每讀書至此未嘗不掩卷流涕傷其計之過也若使此四君者方其用兵之初隨即敗衄惕然戒懼知用兵之難則禍敗之興當不至此不幸每舉輒勝故使狃于功利慮患不深臣故曰勝則變遲而禍大不勝則變速而禍小不可不察也昔仁宗皇帝覆育天下無意于兵將

士情踰兵革朽鈍元昊乘間竊發西鄙延安涇原麟府  
之間敗者三四所喪動以萬計而海內晏然兵休事已  
而民無怨言國無遺患何者天下臣庶知其無好兵之  
心天地鬼神諒其有不得已之實故也今陛下天錫勇  
智意在富強即位以來繕甲治兵伺候鄰國羣臣窺見  
此指多言用兵其始也弼臣執國命者無憂深思遠之  
心樞臣當國論者無慮害持難之識在臺諫之職者無  
獻替納忠之議從微至著遂成厲階既而薛向為橫山

之謀韓絳效深入之計陳升之呂公弼等陰與之協力  
師徒喪敗財用耗屈較之寶元慶歷之敗不及十一然  
而天怒人怨邊兵皆叛京師騷然陛下為之盱食者累  
月何者用兵之端陛下作之是以吏士無怒敵之意而  
不直陛下也尚賴祖宗積累之厚皇天保佑之深故使  
兵出無功感悟聖意然淺見之士方且以敗為恥力欲  
求勝以稱上心於是王韶構禍於熙河章惇造孽於梅  
山熊本發難於渝瀘然此等皆戕殺已降俘纍老弱困

弊腹心而取空虛無用之地以為武功使陛下受此虛名而忽於實禍勉強砥礪奮於功名故沈起劉彞復發於安南使十餘萬人暴露瘴毒死者十而五六道路之人斃於輸送貲糧器械不見敵而盡以為用兵之意必且少衰而李憲之師復出於洮州矣今師徒克捷銳氣方盛陛下喜於一勝必有輕視四夷陵侮敵國之意天意難測臣寔畏之且夫戰勝之後陛下可得而知者凱旋捷奏拜表稱賀赫然耳目之觀耳至於遠方之民肝

腦屠於白刃筋骨絕於餽餉流離破產鬻賣男女薰眼  
折臂自經之狀陛下必不得而見也慈父孝子孤臣寡  
婦之苦聲陛下必不得而聞也譬猶屠殺牛羊刳鱗魚  
鱉以為膳羞食者甚美死者甚苦使陛下見其號呼於  
梃刃之下宛轉於刀几之間雖八珍之美必將投筯而  
不忍食而況用人之命以為耳目之觀乎且使陛下將  
卒精強府庫充實如秦漢隋唐之君則既勝之後禍亂  
方興尚不可救而況所任將吏罷軟凡庸較之古人萬

萬不逮而數年以來公私窘乏內府累世之積掃地無餘州郡征稅之儲上供殆盡百官廩俸僅而能繼南郊賞給久而未辦以此舉動雖有智者無以善其後矣且饑疲之後所在盜賊蠭起京東河北尤不可言若軍事一興橫歛隨作民窮而無告其勢不為大盜無以自全邊事方深內患復起則勝廣之形將在於此此老臣所以終夜不寐臨食而歎至於慟哭而不能自止也且臣聞之凡舉大事必順天心天之所向以之舉事必成天

之所背以之舉事必敗蓋天心向背之迹見於災祥豐歉之間今自近歲日蝕星變地震山崩水旱癘疫連年不解民死將半天心之向背可以見矣而陛下方且斷然不顧興事不已譬如人子得過於父母惟有恭順靜默引咎自責庶幾可解今乃紛然詰責奴婢恣行箠楚以此事親未有見赦於父母者故臣願陛下遠覽前世興亡之迹深察天心向背之理絕意兵革之事保疆睦鄰安靜無為為社稷長久之計上以安二宮朝夕之養

下以濟四方億兆之命則臣雖老死溝壑瞑目於地下  
矣昔漢祖破滅羣雄遂有天下光武百戰百勝祀漢配  
天然至白登被圍則講和親之議西域請吏則出謝絕  
之言此二帝者非不知兵也蓋經變既多則慮患深遠  
今陛下深居九重而輕議討伐老臣庸懦私竊以為過  
矣然而人臣納說於君因其既厭而止之則易為力迎  
其方銳而折之則難為功凡有血氣之倫皆有好勝之  
意方其氣之盛也雖布衣賤士有不可奪自非智識特



達度量過人未有能於勇銳奮發之中舍已從人惟義是聽者也今陛下盛氣於用武勢不可回臣非不知而獻言不已者誠見陛下聖德寬大聽納不疑故不敢以衆人好勝之常心望於陛下且意陛下他日親見用兵之害必將哀痛悔恨而追咎左右大臣未嘗一言臣亦將老且死見先聖於地下亦有以藉口矣惟陛下哀而察之

弔古戰場文讀之令人心酸此篇讀之令人神悚此

種人直是關係數千百世國運數十百萬生靈者至  
大也○諸葛公六出祁山宋高宗帝主和議又當別  
論篇中故有得已不得已之分○神宗以用兵故前  
後喪師至六十萬聞報傍徨歎悼悔艾無及以隕其  
身此疏痛切言之其驗若券

志林論始皇

蘇軾

秦始皇時趙高有罪蒙毅按之當死始皇赦而用之長  
子扶蘇好直諫上怒使北監蒙恬兵於上郡始皇東遊

會稽並海走瑯琊次子胡亥李斯蒙毅趙高從道病使蒙毅還禱山川未及還上崩李斯趙高矯詔立胡亥殺扶蘇蒙恬蒙毅卒以亡秦蘇子曰始皇制天下輕重之勢使內外相形以禁姦備亂可謂密矣蒙恬將三十萬人威震北方扶蘇監其軍而蒙毅侍帷幄為謀臣雖有大姦賊敢睥睨其間哉不幸道病禱祠山川尚有人也而遣蒙毅故高斯得成其謀始皇之遣毅毅見始皇病太子未立而去左右皆不可以言智雖然天之亡人國

其禍敗必出於智之所不及聖人為天下不恃智以防  
亂恃其無致亂之道耳始皇致亂之道在用趙高夫閹  
尹之禍如毒藥猛獸未有不裂肝碎首也自有書契以  
來惟東漢呂彊後唐張承業此二人號稱善良豈可望  
一二于千萬以取必亡之禍哉然世主皆甘心而不悔  
如漢桓靈唐肅代猶不足稱怪始皇漢宣皆英主亦沉  
於趙高恭顯之禍彼自以為聰明人傑也奴僕薰腐之  
餘何能為及其亡國亂朝乃與庸主不異吾故表而出

之以戒後世人主如始皇漢宣者或曰李斯佐始皇治天下不可謂不智扶蘇始皇子秦人戴之久矣陳勝假其名猶足以亂天下而蒙恬持重兵在外使二人不即受誅而復請之則斯高無遺類矣以斯之智而不慮此何哉蘇子曰嗚呼秦之失道有自來矣豈獨斯高之罪自商鞅變法以誅死為輕典以參夷為常法人臣狼顧脅息以得死為幸何暇復請方其法之行也求無不獲禁無不止鞅自以為軼堯舜而駕湯武矣及其出亡而

無所舍然後知為法之弊夫豈獨鞅悔之秦亦悔之矣  
荆軻之變持兵者熟視始皇環柱而走而莫之救者以  
法重故也李斯之立胡亥不復忌二人者知威令之素  
行而臣子不敢復請也二人之不敢復請亦知始皇之  
驚悍而不可回也豈料其偽也哉周公曰平易近民  
必歸之孔子曰有一言而終身行之其恕矣乎夫以忠  
恕為心而以平易為政則上易知下易達雖有賣國之  
奸無所投其隙倉卒之變無自發焉然其令行禁止蓋

有不及商鞅者矣而聖人終不以此易彼商鞅立信于  
徒木立威于棄灰刑其親戚師傅積威信之極以至始  
皇秦人視其君如雷電鬼神不可測識也古者公族有  
罪三宥而後致刑今至使人矯殺其太子而不忌太子  
亦不敢請則威信之過也故夫以法毒天下者未有不  
反中其身及其子孫者也漢武始皇皆果于殺者也故  
其子如扶蘇之仁則寧死而不請如戾太子之悍則寧  
反而不訴知訴之不察也戾太子豈欲反者哉計出於

無聊也故為二君之子者有死與反而已李斯之智蓋足以知扶蘇之必不反也吾又表而出之以戒後世人主之果於殺者

因始皇而忽及漢宣漢武所以勗人謹微勉人存厚者實為良鑑文亦雄偉宕逸自行自止承接之迹都化此等文惟韓集原道等篇有之柳歐曾王末數數也

臣事策一

蘇轍



天下有權臣有重臣二者其迹相近而難明天下之人知惡夫權臣之專而世之重臣亦遂不容於其間夫權臣者天下不可一日而有而重臣者天下不可一日而無也天下徒見其外而不察其中見其皆侵天子之權而不察其所為之不類是以舉皆嫉之而無所喜此亦已太過也今夫權臣之所為者重臣之所切齒而重臣之所取者權臣之所不顧也將為權臣耶必將內悅其君之心委曲聽順而無所違戾外竊其生殺子奪之柄

黜陟天下以見已之權而沒其君之威惠內能使其君  
歡愛悅懌無所不順而安為之上外能使其公卿大夫  
百官庶吏無所不歸命而爭為之腹心上愛下順合而  
為一然後權臣之勢遂成而不可拔至於重臣則不然  
君有所為不可則必爭爭之不能而其事有所必不可  
聽則專行而不顧待其成敗之迹著則上之心將釋然  
而自解其在朝廷之中天子為踧然而有所畏士大夫  
不敢安肆怠惰於其側爵祿慶賞已得以議其可否而

不求以為己之私惠刀鋸斧鉞已得以叅其輕重而不求  
以為己之私勢要使天子有所不可必為而羣下有  
所震懼而已不與其利何者為重臣者不待天下之歸  
已而為權臣者亦無所事天子之畏已也故各因其行  
事而觀其意之所在則天下誰可欺者臣故曰為天下  
安可一日無重臣也且今使天下而無重臣則朝廷之  
事惟天子之所為而無所可否雖天子有納諫之明而  
百官畏懼戰慄無平昔尊重之勢誰肯觸忌諱冒罪戾

而為天下言者惟其小小得失之際乃敢上章謹譁而無所憚至於國之大事安危存亡之所繫則將卷舌而去誰敢發而受其禍此人主之所大患也悲夫後世之君徒見天下之權臣出入唯唯以為有禮而不知此乃所以潛潰其國徒見天下之重臣剛毅果敢喜逆其意則以為不遜而不知其有社稷之慮二者淆亂於心而不能辨其邪正是以喪亂相仍而不悟何足傷也昔者衛太子聚兵以誅江充武帝震怒發兵而攻之京師至

使丞相太子相與交戰不勝而走又使天下極其所往而翦滅其迹當此之時苟有重臣出身而當之擁護太子以待上意之少解徐發其所蔽而開其所怒則其父子之際尚可得而全也惟無重臣故天下皆知之而不敢言臣愚以為凡為天下宜有以養其重臣之威使天下百官有所畏忌而緩急之間能有所堅忍持重而不可奪者竊觀方今四海無變非常之事宜其息而不作然及今日而慮之則可以無異日之患不然者誰能知

其果無有也而不為之計哉抑臣聞之今世之弊在於  
法禁太密一舉足不如律令法吏且以為言而不問其  
意之所屬是以雖天子之大臣亦安敢有所為於法律  
之外以安天下之大事故為天子之計莫若少寬其法  
使大臣得有所守而不為法之所奪昔申屠嘉為丞相  
至召天子之倖臣鄧通立之堂下而詰責其過是時通  
幾至於死而不救天子知之亦不一為怪而申屠嘉亦  
卒非漢之權臣由此觀之重臣何損於天下哉

論既切中筆復閤暢蘇氏之長技也然權臣重臣二者最難辨唯在人君之明哲信任耳嘗試約而論之漢之有申屠嘉霍光諸葛亮此重臣也若周亞夫蕭望之王嘉楊震李固杜喬則可為重臣而卒以忠死者也房魏之在太宗李德裕之在武宗此重臣也若褚遂良長孫無忌以重臣而死陸贄以重臣而貶裴度以重臣而終不得行其志者也宋之王旦李沆韓琦司馬光此重臣也若范仲淹父子趙鼎李綱趙汝

愚則以重臣而或疎遠不用且或貶死者也即以偏  
安者論之燕之用慕容恪秦之用王猛周之用王朴  
此重臣也郭崇韜雖非純臣然在莊宗時亦可為重  
臣以讒見殺唐禍以速嗚呼可不慎哉

貽蘇軾書

畢仲游

孟軻不得已而後辨孔子欲無言古人所以精謀極慮  
固功業而養壽命者未嘗不出乎此天下論君之文如  
孫臏之用兵扁鵲之醫疾固所指名者矣雖無是非之



言猶有是非之疑又況具有邪官非諫臣職非御史危身觸諱以游其間殆猶抱石而拯溺也

杜祁公衍有一門人將作外吏素好激論者公戒之曰無益于事徒取禍耳與此同意文忠亮節雄文光遠有耀其亡也李廌嘗悼之曰皇天后土識一生忠義之心名山大川還千古英靈之氣文忠足以當之然徃徃以言語得罪少停蓄泓涵亦其完養有未至處

論恢復疏

岳飛

金人所以立劉豫於江南蓋欲荼毒中原以中國攻中國尼堪因得休兵觀釁臣欲陛下假臣日月便則提兵趨京洛據河陽陝府潼關以號召五路叛將叛將既還遣王師前進彼必棄汴而走河北京畿陝右可以盡復然後分兵濬滑經畧兩河如此則劉豫成擒金人遠遁社稷長久之計寔在此舉

成算在胸○武穆之功非徒破金也如李成楊太諸

劇賊皆擁數十萬衆非武穆孰能破滅○武穆折節讀書惟守忠孝二字行已公正無取禍之道乃為賊檜所殺死時年方三十九痛哉○宋朝有二大可恨事一則變元祐為紹聖諸賢貶斥為黨人是也一則秦檜殺武穆是也使江文通著筆作賦不知更如何恨乎○先儒謂孔明不死三年可以取魏乃功未成而卒于軍天也武穆累捷恢復方張乃召之回而人殺之人也天乎○胡致堂謂漢武時若用董仲舒為

相汲黯為御史大夫最得余謂高宗朝若用李忠定為相岳武穆為將何仇之不復哉

送程復亨序


朱松

廣平程某復亨為余外兄從余游於閩者二年余語以安逸憂患知之詳矣將歸省其母及其祖母其可以無言司徒文子問于子思曰親喪三年未葬則何服子思曰三年而未葬則服不除也故告之一曰葬吾舅而後加吉服夫子失魯司寇將之荆先之以子夏申之以冉

有曰喪不欲其速貧古之君子以失位于諸侯曰喪喪不欲其速貧若是其急也故告之二曰葺爾居以寧爾親蓬生麻中不扶自直植之榛莽則與之靡然故告之三曰非爾父之類者勿親也江出岷山自荆之楚汪洋千里而至於海者大川三百小川三千以為之助也故告之四曰廣學問以資見聞傳曰宴安鴆毒不可懷也君子非獨惡懷安之敗名惡其敗性也故告之五曰勿懷安禮曰男子生則以桑弧蓬矢射天地四方示志也

夫不資之軀豈其浮沉鄉里而名不稱故告之六曰無  
忘四方之志夫齊之善味者淄澠之合能辨之淄澠之  
合均是水也子歸矣他日執經而來問予能入于常流  
而不變其味乎尚能為君辨之

送行之序別有良規另一格調贈人以言此本之老  
子贈孔子及回路二子相請贈與處最是古意後世  
滿紙虛詞多譽少規失之遠矣



古文雅正卷十二